

ASEKWI SOLO SOLO.

ASEKWI SOLO SOLO

Yesu Klisto Nkolo na biso... asekwi solo solo.

Likambo moko te oyo esalemaki tango ya kosulubama ya Nkolo Yesu, tango ya kokundama na Ye, mpe tango ya kosekwa na Ye, ezalaki ya mpamba to ya likama. Makambo nyonso wana ezalaki na mokano ya Nzambe mpe na elilingi monene ya molimo. Ata likambo moko te esalemaki na mposa ya bato to libanda ya mwango ya Nzambe.

Ata tango Nkolo Yesu amemaki ekulusu na Ye tii na Golgota, nzoto nyonso etondaki na bapota, likambo yango esakolamaki kala. Afananisamaki na mwana-mpate oyo bamemaka na kobomama.

- Yisaya 53:7

“Banyokolaki Ye, kasi Andimaki, afungolaki monoko te; lokola mwana-mpate oyo bamemaka na kobomama, lokola mpate oyo efandaka kimia liboso ya baoyo bakataka nsuki na yango,

Ye mpe afungolaki monoko te.”

Likambo ya kotobola Ye mopanga na mopanzi esakolamaki mpe kala (*Zekaria 12:10*). Ezalaki na ndimbola monene na molimo mpe na nzoto.

Na molimo: makila mpe mayi ebimaki. Na makila na Ye, masumu na biso epetolamaka mpe tozwaka bolimbisi ya solo. Na mayi, topetolamaka na Liloba ya Nzambe (*Baefeso 5:26*).

Na nzoto: batobolaki Ye mpo na kondimisa ete akufaki ya solo. Soki batobolaki Ye te, bato balingaki koloba ete bakitisaki Ye na ekulusu azalaki naino na bomoi, mpe soki batie Ye na lilita akufaki te malamumu. Nzambe ayebaki nyonso wana, yango wana atikaki ete batobola Ye, mpo bato bamona polele ete akufaki solo. Moto moko te akoki kotobolama tii na motema mpe atikala na bomoi. Baroma bazalaki kosalelansela wana mpo na kosilisa moto oyo akufi naino te malamumu.

Ndenge moko mpe, likambo ya Pilato kokoma likambo likolo ya ekulusu na minoko misato ezalaki ya mpamba te. Ezalaki esakweli ete na mikolo ekoya, Klisto akosakolama na bikólo nyonso mpe na minoko nyonso.

- Yoane 19:19-22

Pilato akomaki mokanda mpe atiaki yango likolo ya ekulusu; bakomaki: YESU YA NAZARETI, MOKONZI YA BAYUDA.

Bato mingi na Bayuda batangaki yango, mpo esika oyo basulubaki Yesu ezalaki pene ya engumba; mpe bakomaki yango na Liebele, na Lalatini mpe na Ligeleki.

Banganga-nzambe minene balobaki na Pilato: "Kokoma te 'Mokonzi ya Bayuda,' kasi 'Moto oyo alobaki: Nazali Mokonzi ya Bayuda.'"

Pilato azongisaki: "Oyo nakomi, nakomi yango."

Na mokolo ya Pantekote, tango Molimo Mosantu akitelaki bayekoli, babandaki koloba na minoko ya bikólo mingi. Yango elingaki koloba ete ntango ekoki mpo sango ya liwa mpe lisekwa ya Yesu esakolama na mokili mobimba. Na tango wana minoko misato nde eyebanaki mingi; kasi lelo, minoko eleki nkóto motoba, mpe kati na yango nyonso, sango ya Klisto esakolami.

Mpo na nini batyaki libanga monene mpo na kokanga lilita mpe batiaki elembo likolo na yango? Elembo yango ezalaki mpo na kondimisa ete moto moko te akoki kokota to kobima. Libanga

yango ezalaki monene mingi, ezalaki pamba te lokola oyo tomonaka na masano ya sinema. Ezalaki monene koleka, esengelaki bato mingi mpo na kobalola yango.

- Marko 16:2-4

Na ntongo-tongo, mokolo ya liboso ya pɔsɔ, bakei na lilita tango moi ebandaki kobima.

Bazalaki kolobana: “Nani akobalolisa biso libanga na monoko ya lilita?”

Tango batalaki, bamoni ete libanga ebalolami; ezalaki monene mingi.

Mpe malaika abalolaki libanga te kaka pene ya monoko ya lilita, kasi mosika na lilita.

- Luka 24:1-2

Na ntongo ya mokolo ya liboso ya pɔsɔ, bakei na lilita na biloko ya solo kitoko oyo babongisaki.

Bamoni libanga ebalolami mosika na lilita.

Yango ezalaki elembo ete likambo ya kokamwa esalemaki kuna. Nzambe atikaki ete libanga ezala monene mpo tango ebalolami mosika, bato bandima ete lisekwa esalemi ya solo. Yesu asekwi solo solo.

Mpe atikaki basoda bamonaka malaika kokita lokola kongenga ya nkake, mpo bakende koyebisa banganga-nzambe minene (*Matai 28:1-4*). Nzambe alingaki ete batatoli bazala na ngambo nyonso.

Makambo nyonso wana esalemaki mpo ngai na yo tondima ete Yesu asulubamaki, akufaki mpe asekwi uta na bakufi. Soki ondimi yango na motema mobimba, okozua lobiko.

Soki lelo ondimi ete Klisto azali na bomoi mpe azali na lilita te, mpe azali na nguya ya kobikisa yo, esengeli obongola motema (obongola nzela), otika masumu na yo mpe osenga bolimbisi. Alingi kosukola yo mpe kopetola yo mpo alingi yo mingi.

Bolingo na Ye ezangi ndelo. Azali pene ya kolimbisa yo masumu nyonso, ata ezalaki minene ndenge nini.

Sik'oyo, kabwana mwa ntango, fukama, mpe loba na kondima:

LIBONDELI

E Nzambe Tata, naye liboso na Yo, nayebi ete nazali mosumuki mpe nasali masumu mingi. Nabongi na etumbu. Kasi Yo olobaki na Liloba na Yo ete ozali Nzambe ya mawa, owa bolimbisi na baoyo balingi Yo. Lelo naye kosenga bolimbisi mpe lisungi na Yo. Nabongoli motema mpo na masumu na ngai nyonso.

Nandimi ete Yesu Klisto azali Nkolo mpe Mobikisi ya mokili. Nasengi makila ya Mwana na Yo epetola ngai sik'oyo mpe ekómisa ngai ekelamu ya sika banda lelo mpe libela.

Merci Nkolo Yesu mpo opokoli ngai mpe olimbisi ngai.

Amen.

Soki olobi libondeli yango na kondima, esengeli omonisa yango na

misala. Tika makambo nyonso oyo esepelisaka Nzambe te.
Nzambe akomona mbongwana na yo mpe akoya kofanda kati na yo.

Luka lingomba ya molimo mpo okola na kondima, oyekola Liloba ya Nzambe mpe ozwa batisimo ya solo na kozindisama na mayi, na Nkombo ya Nkolo Yesu Klisto mpo na bolimbisi ya masumu.

Nzambe apambola yo na mokano na yo ya bwanya.
(Ezali elembo ete ondimi ete Klisto asekwi solo solo.)

Share on:
WhatsApp